

IN DÌ D'OGGHJI

Conti di Saldigna

La dì 30 di Malzu di lu 1403

GHJUANNI DI SALDIGNA VÈNI POSTU FÓCU A TRAMUNTANA D'ITALIA (NORD)

La dì 7 di Ghjinnàgghju di lu 1403 Manuéddhu Bartolomei, castiddhanu di Caprie, una 'iddha di la 'Addhi di Susa, fési punì in galéra **Ghjuanni Sensi, chjamatu ancóra Ghjuanni di Saldigna**, chjudendilu illu castéddhu di lu paesi. Lu 'ntalghési in Rivoli lu domenicanu fra' Ghjuanni da Susa, incuisidóri «ingarrigatu da la sedi apostolica contra l'eretica malvagitài». Addananzi a iddhu, dapói d'aé datu nommu falzu, ammittisi chi, chèna esse preti, predicaa, cunviltia, assulvia da li piccati e sanàa li malati. Sustinìsi ancóra chi, vinèndi da la 'Spagna, era inghjittatu vel di Val di Santu Maltinu, illu bergamascu, ingarrigatu di piddhà cuntatti cun paesani di valdesi. Postu a innanzi chi, pa' chisti ammissioni, un passunagghju impultanti di un muimentu ereticu, sfuggghjisi a la cundanna a molti grazi a la cunfissìoni e a lu rinnécu chi ni sighi. Lu punìsini in piazza a cara a ghjenti cun un cappeddhu curiòsu in capu e un signu di gruci innantu a lu 'istìri, addananzi a li ghjesgi di Rivoli, di Avigliana e di Susa e dapói lu scappésini. Ghjuanni no s'allalghési da Susa, anzi turrési a pridicà, dicendi di esse un arcipreti di Vicenza. Lu punìsini torra in galéra illu mesi di Malzu, lu 'ntalghési la dì 7 Malzu l'abate di lu conventu di Santu Ghjustu e lu 'nchisidóri Ghjuanni di Susa. Ammittisi di esse natu in Saldigna, a Iglesias (Villa Ecclesia), di chjamassi Ghjuanni Sensi, di esse fiddhólu di Birraldu e di Subilia, intarràti da tempu, e di no esse un preti. Lu 'nchisidóre impunìsi a lu castiddhanu di Caprie, «sia suttu pena di scuminica sia di una cuntravvinzìoni di centu malchi di pratta, di punillu suttu a tultura», fendilu cunfissà primma di 2 dì. Lu processu s'abbrìsi la dì infattu, addananzi a la ghjanna di lu casteddhu di Caprie e addananzi a lu «nobbili e potenti 'omu manuéddhu Baltolomei di Susa», castiddhanu di Susa, di lu «preti don Ghjacu, di Santu Ghjustu di Susa» e di « fra Ghjuanni di Susa di l'oldini di li frati pridicadóri di



Rivoli, inchisidóri di l'eretica malvagitài». Ghjuanni Sensi cunfissési chi ghjà «dodici o sedici anni primma» un incuisidóri di Calatayud, inn Ispagna, l'ala impostu innantu a lu 'istìri un signu di gruci rùia, «palchè cussi si signani li Valdesi in chissi lóchi».

Ancóra lu 'ncuisidóri di Saragozza, l'agostinianu fra' Ghjuanni, li impunìsi, più addananzi, lu 'istìri cun la gruci rùia e, appiù, li malchési lu pistiddhu «cu' un signu di gruci fattu cu' un farru caldu», ghjabbèndi chi siddhu lu turràa a fà saria statu casticàtu cu' lu fócu.

Cunfissési di aé presu palti a l'abboi valdesi da guasi 20 anni, la primma 'òlta a Salamanca, «undi fésini un abboiu di guasi 1500 passòni tra òmini e fèmini. E in chissu lócu a candéli spinti disini "quis habet teneat" (cal' à, lu mantenghia)». La dì 19 di malzu lu tribunali s'agattési inn Avigliana illa ghjesgia di Santu Ghjuanni. Dichjarésini chi Ghjuanni Sensi dia esse inghjittàtu com'e ereticu recidivu - relapso - e dunca dia esse «postu a lu bracciu secolari pa' esse casticàtu cun la pena di mòlta». **La dì 30 di Malzu**, accultu a li muri di lu casteddhu di Caprie, dapói d'aénnilli bucatu li dui gruci rùì chi pultàa innantu a lu 'istìri, **li ligghjìsini la sintènzia**. La dì mattessi punìsini apparu la sintènzia, no si cunnosci bè lu lócu «**a laccana di Condove**».